

重修嵐縣志卷之十四

藝文

國家制度文為載在會典省郡州邑之因革利弊則悉載於志以資後人之考核昔孔子歎文獻不足以致言禮無徵是藝文者即典故事蹟之所存而可以為徵者也嵐雖蕞爾區援古証今之文見諸記傳碑銘之內陽春白雪之句刑諸吟咏唱嘆之中其間賢哲之林或以行能顯或以文章名雖所造不同咸

得垂範於後修志者必錄焉

碑記

創建宣聖廟碑記 前奉御王居實撰

易曰一陰一陽之謂道繼之者善也成之者
性也蓋天之所以為天地之所以為地人之
所以為人陰陽也剛柔也仁義也故曰立天
之道曰陰與陽立地之道曰柔與剛立人之
道曰仁與義至我

先師夫子乃以堯舜之道為仁義之道堯舜之

道至矣盡矣三王因之豈有二致周德既衰
壞亂極於幽厲聖人之道蕩然矣我

先師夫子取先王之道垂訓將來為萬世不易
之法與天地相為終始賢於堯舜遠者信不
誣矣爰自京師下逮府州郡縣皆有

文宣聖廟所以報德也嵐州在河東為名郡例
有文廟板蕩後圯壞殆盡我國家自定鼎
以來文教勃興郡守尚不能舉逮將任崔寧
來判是州始有完復之志仍廟學故地量度

廣袤經營伊始即解組去大德己亥知州郝
承來守是郡到任之初同州判冀將仕安仁
詣視文廟圯毀慨嘆荒蕪諮於僚佐掾屬
謀於學官丁恭及耆老張邦直劉仔范楨范
珪等同心協力孜孜於廟事樹板榦建基址
募工討役選用梓材肇正殿及兩廡粧塑

宣聖配以顏孟列以十哲未幾而去歲在乙巳
冬史承務好禮字彥和奉聖用人為人端肅
所舉廉平來同知是州一日彥和與同僚監

郡不蘭奚敦武嵐州王利賓節判耿將仕觀
同議曰此郡 文廟前任創脩未經完備各
任終代去莫若出已俸金繪曾子以下諸子
於兩廊將殿宇金碧亦勝事也同僚欣諾彥
和公餘之暇用心營繕構中門創建明倫堂
并月臺基址用磚包砌金碧簷楹刊顏額造
供床祭皿咸皆一新公蒞古鄯剖析冤抑民
歌清白任此譽同今完是廟彥和之功也擇
取境內閑田為贍學地土計二頃餘教育英

材崇德義也且始為飲食者猶祀以報功况
我

先聖夫子刪述六經作極萬世俾邪說殄行卒
莫能行享祀無窮復何議哉夫郡長州倅職
在承流宣化必以學校為先崇學校必以

先聖廟祀為重嵐守前達魯花赤滅力沙等能
此可謂明矣可謂知所本矣可不文其石而
歌之耶其詩曰社本勾芒稷祖周棄民賴以
生報功欽祀矧我

先師人道斯備明竝居諸德配天地超乎三王
賢於二帝血食萬方光被萬世粵茲嵐州初
有廟堂遺址無踪寧不悲傷興復誰何郡守
實良乃基乃構乃墉乃墻殿宇山峙廊廡翼
張聖像儼然耀袞而裳廣飾泮宮曰序曰庠
春秋釋菜禮容不忒承流宣化其職迺得同
樂風雲載詠文德厥功告成敢忘刻石垂示
將來庶幾勿失豈元至大元年九月吉日

重修靈淵侯廟記

嵐州學正王安良撰

靈神祠宇古所不廢以其能禦災捍患有益生
民也其開端立意者謂之創因舊增飾者謂之
脩脩者復而已然二者非遇仁智之君子豈能
為耶嵐州大萬山靈淵侯神祠自昔所創每歲
旱澇為災詣廟祈禱必能捍禦災祲有益於民
至正戊申從春及夏陰雲不解霪雨傷禾民庶
惶惶罔知所告本州鎮禦奉訓大夫同簽將作
院事兼達魯花赤伯不花大中大夫同簽河南
樞密院事兼知州趙中喟然歎曰國以民為本

民以食為天今雨滂為災倘田禾失稔民不聊
生國將何賴深為牧民者憂遂齋沐於六月一
日親詣神祠焚香叩拜自責祈禱終日心無倦
怠蓋由誠發於中倦有不覺越翼日風生西北
雲散東南赫赫炎炎天地開朗禾苗為之茂育
民心忻然大悅於是二公感神靈貺復以祠寧
塑像歷年久遠剝落摧殘其心惻然遂捐已俸
鳩材聚工命重修飭不旬日而聖像祠宇煥然
一新矣同官鄉耆咸美二公之誠德命愚為記

愚謂曰神有感應之理者由人之有所感於彼然後有以應於此也今神能禦滂災俾禾有成民賴以生由我二公誠心所感而致又復捐俸修飾祠像俾之復古斯可謂仁智之君子也遂書石以記皆元至正二十八年

重修學廟記 嵐縣縣丞高九萬撰

夫學宮為禮義教化之原嵐為古并西八州之一其來尚矣徵諸遺碣粵自宋元豐年間城依崇崗俯瞰城中矢石可及預備未良是故闕罔

阜而城之迄今四百有餘年矣歷歲滋久累罹
兵燹悉皆瓦礫惟 聖廟在焉惟我 聖朝開
國膺天混一寰宇四海一家設官責任崇尚文
治建州立邑務在質實所以等戶田之優劣以
為州縣蓋建官而不虛其職立州而不浮其名
焉愚一介儒生叨逢盛時明良慶會洪武辛亥
舉愚以秀才官愚以二牧冬十一月來任是邦
戶計五百八十有奇口計二千一百有奇田則
八百八十九頃八十餘畝糧止六千八百七十

餘石數甚鮮少而嵐之為邑蓋以是焉之任厥
初禮於孔廟聖像儼然餘悉無可言者且子
衿尚訓誨於民房尋即鳩工建明倫堂進德齋
聊資訓迪願欲急修學宮患其獨貝有志未償
越明年夏六月幕賓趙中來叅贊畫未幾秋九
月杜從事來宰斯邑又明年夏四月李將仕佐
來判厥簿深愜官備私占學宮之興修此其時
也既而創兩廡於東西建育材齋築垣設闕百
堵皆作遂以落成其於聖哲之遺像存者粉飾

之四賢之未備者粧塑之煥然一新庶幾列賢
哲於兩廡而釋奠為有序集生徒於兩齋而教
化為有本適副愚素所願望詎非物之有數待
其人而後行歟今年季夏幕賓滿迴季秋杜從
事考滿又迴仲冬愚亦將入覲訓導安良語余
日一任之官咸以榮滿繼軌朝覲而崇修學宮
之盛胡不留事於碑不然老夫為有憾焉請為
記之以永其傳愚日不暇徼功殆堪塞責其奚
足書姑惟置之春日二三公下車以來逮夫膏

秣言旋戶口益幾倍莖田糧幾四之一邦民化
之訟至於無刑者舊請欲題名於刻二公終莫
見俞尚亦有異哉其間營修雖夥首以學宮為
務者莫公若也公勤修學不惟有以見朝廷文
治之隆亦且為一代開設之盛記之胡不偉歟
而拒之若是其必耶懇懇若思固辭不獲爰命
泓穎輩勉誌歲月云時洪武九年二月

城隍廟感應記

知縣李亨撰

事有切於人者不必提命之縷而後有所詣也

雖畧爾而試之亦自省焉激焉況又其著者乎
居間吏人張鳳翔者持府牒進日茲歲入夏時
以公故得雨民賴以安今時又入旱矣奈何子
司民牧者一聞斯言不覺驚悸流汗且謂之日
言何晚也奈何對日幸此牒在公無忽焉庶克
有濟余顧謂日尚需汝言縷耶迺檢牒內所云
應祀進祈者莫我城隍若也宜如何處也日具
牲牢醴酌往禱之宜也日其然也第汝弗之達
爾夫禮以義起義安則禮行矣烏在是耶夫請

禱於上下神祇必湛然焉爾矣必肅然焉爾矣
必衣冠儼然焉爾矣變食遷坐斷宰殺禁屠沽
清獄釋愆事罔後遺神方監觀有赫著靈炳若
雲起山川雨施下土苗壠告登三秋入望此于
本圖之舍是崇美觀飾壇壝亦未矣夫未具而
本遺顧安能取必其應耶况牒有屠沽之禁之
說而不之察輒用屠之肉沽之醴於明神几下
是之謂弗達矣嗚乎會謂皇皇者帝而弗達此
者乎余舍是惟於本而圖之庶獲祐爾矣夫所

謂本者齋戒衣冠之類之說是也朝焉持是拜
禱焉弗獲夕焉持是拜禱焉又弗獲再朝再夕
持是又愈拜禱焉冀有獲焉果獲甘雨下注森
森如竹不疾不徐晝晝夜止蓋惟時五月十日
戊申也凡自官吏下莫不稽首崩悅相與颺言
曰吾神之靈一雨之力萬民之命係也敢止於
拜嘉乎吏鳳翔輩再拜于堂下曰非公之監觀
未必昭格之至此也惟公弗聽某等之所言是
命也若從某等之所言是狗也若惟狗焉是逐